

王臨川全集

埽葉山房印行

王臨川全集卷三

律詩 五言 五言長律附

欣會亭

數家鄰水竹一塢共雲林晚食靜適已獨謠欣會心移牀隨漫興操筴取幽尋
未愛神錐汝猶憐鈔斲琴

東臯

起伏晴雲徑縱橫暖水陂草長流翠碧花遠沒黃鸝楚製從人笑吳吟得自怡
東臯興不淺遊走及芳時

歲晚

月映林塘澹風含笑語涼俯窺憐淨綠小立伫幽香攜幼尋新葯扶衰坐野航
延緣久未已歲晚惜流光

半山春晚卽事

春風取花去酬我以清陰翳翳陂路靜交交園屋深牀數每小息杖屨或幽尋
惟有北山鳥經過遺好音

欹眠

翠幙卷東岡，欹眠月半牀。松聲悲永夜，荷氣馥初涼。清話非無寄，幽期故不忘。扁舟亦在眼，終自懶衣裳。

露坐

露坐看溝月，飄然風度荷。珠跳散作點，金湧合成波。老失芳歲易，靜知良夜多。淩秋久不寐，吾樂豈弦歌。

山行

出寫清淺景，歸穿蒼翠陰。平頭均楚製，長耳嗣吳吟。暮嶺已佳色，寒泉仍好音。誰同此真意，倦鳥亦幽尋。

題雱祠堂

在寶公塔院

斯文實有寄，天豈偶生才。一日鳳鳥去，千秋梁木摧。煙畱衰草恨，風造暮林哀。豈謂登臨處，飄然獨往來。

定林

漱甘涼病齒，坐曠息煩襟。因脫水邊屨，就數巖上衾。但畱雲對宿，仍值月相尋。眞樂非無寄，悲蟲亦好音。

送張甥赴青州幕

人情每期費之子適子心老餞城東陌悲分歲暮襟少畱班露草遂往隔雲林未覺青丘遠因風嗣好音

送張宣義之官越幕二首

會稽遊宦鄉海物錯句章土潤箭萌美水甘茶串香今君誠暫屈他日恐難忘唯有西興渡靈胥或怒張

二

誰謂貴公子乃如寒士家眞宜舉敦樸已自勝浮華洲荻藏迷子溪臯擁若耶相望只在眼音問莫言賒

送贊善張軒民西歸

柴荆雀有羅公子數經過邂逅相知晚從容所得多百憂生暮齒一笑隔滄波早晚西州路遙聽下坂珂

送鄧監簿南歸

不見驪塘路茫然四十春長爲異鄉客每憶故時人水閣公三世雲浮我一身濠梁送歸處握手但悲辛

秋夜二首

客臥書顛倒蟲鳴坐寂寥殘燈生暗暈重露集寒條眞樂閑尤見深禪靜更超
此懷無與晤擁鼻一長謠

二

幔逗長風細窻畱半月斜浮煙暝綠草泣露冷黃花獨曳綠雲策仍尋渡水槎
歸時參夜半鄰犬靜中譁

卽事

徑暖草如積山晴花更繁縱橫一川水高下數家村靜憩雞鳴午荒尋犬吠昏
歸來向人說疑是武陵源

晝寢

甲子四月十
七日午時作

井逕從蕪漫青藜亦倦扶百年唯有且萬事總無如棄置蕉中鹿驅除屋上烏
獨眠牕日午往往夢華胥

過故居

泝棧開新屋扶輿遶故園事遺心獨寄路翳目空存野果寒林寂蠻花午簟溫
難忘舊時處欲宿愧桑門

雁

北去還爲客南來豈是歸倦投空渚泊饑帖冷雲飛垣柵雞長暖溝池鷺自肥
憐渠不知此更墮野人機

與道原過西庵遂遊寶乘二首

元豐四年十月二十四日

桑楊

一作麻

已零落藻荇亦復

一作

消沈園宅在人境歲時傷我心強穿西南一作墟

路共望北山岑欲覓

一作與

道人語跨鞍聊一尋

二

親朋會合少時序感傷多勝踐聊爲樂清談可當歌微風淡水竹淨日暖煙蘿
興極猶難盡當如薄暮何

送陶氏婦兼寄純甫

雲結川原暗風連草木萎遙瞻季行役正對女傷悲夢事中千變生涯老百罹
更慚無道力臨路涕交頤

自府中歸寄西庵行詳

意衰難自力扶路便思還強逐蕭騷水遙看慘淡山行尋香草遍歸漾晚雲閒
西崦分明見幽人不可攀

贈上元宰梁之儀承議

梁多留詩在江寧僧舍

王臨川集卷三
白下有賢宰能歌如紫芝民欺自不忍縣治本無爲風月誰同賞江山我亦思
粉牆侵醉墨悵悵綠苔滋

贈殊勝院簡道人

早悟青山讞今爲洛社豪有生常寂寞所得是風騷露夕吟逾苦雲秋思共高
此懷差自適千社一牛毛

懷吳顯道

南郭紅亭冷西山白道曠江光凌翠氣洲色亂黃雲歲暮誰邀客情親故憶君
天涯獨惆悵歸鳥黑紛紛

靜照堂

任公蹲會稽海上得招提淨觀堂新構幽尋客屢攜飛簷出風雨灑翰落虹霓
投老黃塵陌東看路恐迷

重遊草堂次韻三首

垣屋荒葛藟野殿冷檀沈鶴有思暝意鷹無戀遁心禪房閉深竹齋鉢度遙岑
寂寞黃塵裏金身倚一尋

僧殘尚食少佛古但泥多寒守三衣法饑傳一鉢歌寬閑每迸竹危朽漫牽蘿
悵悵庭前柏西來意若何

三

野寺眞蘭若山僧老病多疎鐘挾谷響悲梵入樵歌水映茅簷竹雲埋薦女蘿
拂塵書所見因得擬陰何

題齊安寺山亭

此山無躑躅故國有楊梅悵望心常折慙慙手自栽暮年逢火改晴日對花開
萬里烏塘路春風自往來

自白門歸望定林有寄

蹇驢愁石路余亦倦躋攀不見道人久忽然芳歲殘朝隨雲暫出暮與鳥爭還
杳杳青松壑知公在兩間

宿定林示無外

名務周

天女穿林至姮娥度隴來欲歸今晚晚相值且徘徊誰謂我忘老如聞蟲造哀
鄰衾亦不寐共盡白雲杯

宿北山示行詳上人

都城羈旅日獨許上人賢誰爲孤峰下還來宴坐邊是身猶夢幻何物可攀緣
坐對青燈落松風咽夜泉

獨飯

窻明兩不借榻淨一簾條栩栩幽人夢天天老者居安能問香積誰可告華胥
獨飯牆陰轉看雲坐久如

草堂

草堂今寂寞往事翳山椒蕙帳空畱鶴蘿衣終換貂生皆墮天袞隱或寄公朝
疊穎何勞怒東風汝自搖

示耿天騰

挾策能傷性捐書可盡年弦歌無舊習香火有新緣白土長岡路朱湖小洞天
望公時顧我於此暢幽悃

光宅

今知光宅寺牛首正當門臺殿金碧毀丘墟桑竹繁蕭蕭新犢臥冉冉暮鷗翻
回首千歲夢雨花何足言

示無外

支頤橫口語椎髻曲肱眠莫問誰賓主安知汝輩年鄰雞生午寂幽草弄秋妍
卻憶東窗簾蠻藤故宛然

北山暮歸示道人

一山復萬山行路有無間花發蜂遞繞果垂猿對攀獨尋寒水度欲趁夕陽還
天黑月未上兒童初掩關

懷古二首

日密畏前境淵明欣故園那知飯不餽所喜菊猶存亦有牀座好但無車馬喧
誰爲吾侍者稚子候柴門

二

長者一牀室先生三徑園非無飯滿鉢亦有酒盈樽不起華邊坐常開柳際門
漫知談實相欲辯已忘言

與寶覺宿精舍

擾擾復翩翩秋牀燭屢昏眞爲說萬物豈止挾三言問義曹溪室捐書闕里門
若知同二妄目擊道逾存

中書偶成

忽忽余年往茫茫不自知
慙慙照清淺邂逅見衰遲
輔世無賢業容身有聖時
歸歟今可矣何以長人爲

華藏寺會故人

得泉字

百憂成阻闊一笑得畱連
城郭西風裏園林落照前
共知官似夢莫負酒如泉
興罷重攜手江湖卽渺然

求全

求全傷德義欲速累功名
玉要藏而待苗非握故生
未妨徐出畫何苦急墮成
此道今亡矣嗟誰可與明

秋風

摯斂一何饗天機亦自勞
牆隈小翻動屋角盛呼號
漠漠驚沙密紛紛斷柳高
江湖豈在眼昨夜夢波濤

次韻昌叔歲暮

城雲漏日晚樹凍裏春深
慘密魚雖暖巢危鶴更陰
橫風高曠弩殘瀟細鳴琴
歲換兒童喜還傷老大心

次韻酬昌叔羈旅之作

君方困旅食子亦誤朝簪自索東方米誰多季子金高門萬馬散窮巷一燈深客
主竟何事蕭條梁父吟

次韻唐公三首

東陽道中

山蔽吳天密江蟠楚地深浮雲堆白玉落日寫黃金渺渺隨行旅紛紛換歲陰
強將詩詠物收拾濟時心

江行

材非當世用轂有故人推使節春冬換征帆日夜開南遊取於越東望得州來
試盡風波惡生涯亦可哀

旅思

此身南北老愁見問征途地大蟠三楚天低入五湖看雲心共遠步月影同孤
慷慨秋風起悲歌不爲鱸

烏塘

地僻居人少山稠伏獸多怒狸朝搏雁嚙虎夜窺驪離落生孫竹門庭上女蘿
未應悲寂寞六載一經過

欲歸

水漾青天暖沙吹白日陰塞垣春錯莫行路老侵尋綠稍還幽草紅應動故林
畱連一杯酒滿眼欲歸心

發館陶

促轡數殘更時聞雞一鳴春風馬上夢沙路月中行笳鼓遠多思衣裘寒始輕
稍知田父穩燈火閉柴荆

王村

曉靄王村路春風北使旗塵摧輕騎走寒咽短簫吹攬轡聯貂帽投鞭各酒卮
紛紛小兒女何事倚牆窺

長垣北

攬轡長垣北貂寒不自持霜風急鼓吹煙月暗旌旗騎火流星點牆桑亞戟枝
柴荆掩春夢誰見我行時

冬日

擾擾今非昔漫漫夜復晨風沙不貸客雲日欲迷人散髮愁邊老開顏醉後春
轉思江海上一洗白綸巾

壬辰寒食

客思似楊柳春風千萬條更傾寒食淚欲漲冶城潮巾髮雪爭出鏡顏朱早雕
未知軒冕樂但欲老漁樵

雨中

尚疑櫻欲吐已怪菊成漂紫莧淩風怯青苔挾雨驕長閑故有味多難自無聊
牢落柴荆晚生涯付一瓢

宿雨

綠攪寒蕪出紅爭暖樹歸魚吹塘水動雁拂塞垣飛宿雨驚沙靜晴雲晝漏稀
卻愁春夢短燈火著征衣

乘日

乘日塞垣入御風塘路歸胡皆躍馬去雁卻背人飛煙水吾鄉似家書驛使稀
忽忽照顏色恨不洗征衣

秋露

日月跳何急荒庭露送秋初疑宿雨滋稍怪曉霜稠曠野將馳獵華堂已御裘
空令半夜鶴抱此一端愁

還自河北應客

婉客問謠俗舊傳今自如材難知冀馬味美賽河魚塞水移民久川防動眾初
北人雖異論時議或非疎

將次洺州憩漳上

漠漠春風裏茸茸綠未齊平田鷓散啄深樹馬迎嘶地入河流曲天隨日去低
高城已在眼聊復解輕齋

和仲庶夜過新開湖憶沖之仲涂共泛

水遠浮秋色河空洗夜氛行隨一明月坐失兩孤雲露髮比時濕風顏何處醺
淹畱各有趣不比漢三君

白樂天有二處
成孤雲之句

送契丹使還次韻荅淨因長老

老欲求吾志時方撫我華強將愁出塞空得病還家日轉山河暖風含草木葩
勝遊思一往不敢問三車

送吳叔開南征

摻袂不勝情犀舟擊汰行倦遊無萬里惜別有千名春草淒淒綠江楓湛湛青
金陵多麗景此去屬蘭成

遊棲霞庵約平甫至因寄

渺渺林間路蕭蕭物外僧高陰涼易入閑貌老難增官事真傷錦君恩更飲冰
求田此山下終欲忤陳登

和棲霞寂照庵僧雲渺

平甫
同作

蕭然一世外所樂有誰同宴坐能忘老齋蔬不過中無心爲佛事有客問家風
笑謂西來意雖空亦不空

宜春苑

宜春舊臺沼日暮一登臨解帶行蒼蘚移鞍一作鞍坐綠陰樹疎啼鳥遠水靜落
花深無復增修事君王惜費金

春日

冉冉春行暮菲菲物競華鸞猶求舊友鸞不背貧家室有賢人酒門無長者車
醉眠聊自適歸夢到天涯

癸卯追感正月十五事

正月端門夜金輿縹緲中傳觴三鼓罷縱觀萬人同警蹕聲如在嬉遊事已空
但令千載後追詠太平功

王臨川集卷三
晚興和沖卿學士

刻刻風生晚娟娟月上初白沙眠驥清浪浴鱗魚竟欲從君飲猶便讀我書
斜陽不到處牆角樹扶疎

秋興和沖卿

雲浮朝慘淡風起夜颼颼欲作冰霜地先迴草樹秋征人倚笛怨思婦向砧愁
爲問隨陽雁哀鳴豈有求

次韻沖卿除日立春

猶殘一日臘併見兩年春物以終爲始人從故得新迎陽朝翦綵守歲夜傾銀
恩賜隨嘉節無功祇自塵

題友人郊居水軒

田中三畝宅水上一軒開爲有漁樵樂非無仕進媒槎頭收晚釣荷葉卷新醅
坐說魚腴美功名挽不來

遊賞心亭寄虔州女弟

秀發千峰霽清涵萬里秋滄江天上落明月鏡中流眼與魂俱斷身依影獨留
爲憐幽興極不見爾來遊